

第〇四五册

曆象彙編

庶徵典

豐歉部

疫災部

地異部

(卷)

102—111

112—114

115—117

古今圖書集成

中華書局影印

圖書集成

卷一百一十五

目錄

卷一百一十五

卷一百一十五

古今圖書集成

中華書局影印

縣則賓客之事可知凡此皆舉重以明輕也大夫不食梁則不祭可知士飲酒不樂則不縣可知凡此皆舉小以見大也然君之所以自貶者其類爲多臣之所以自貶者其類爲少豈非位有貴賤故責有輕重歟 馬氏曰大司徒以荒政言弛力皆禮蕃樂則馳道不除弛力也膳不祭肺馬不食穀大夫不食梁皆禮也祭事不縣士飲酒不樂蕃樂也大司樂大因令弛縣則不縣不特祭事而已于祭事言不縣則膳可知也雜記凶年祀以下牲則祭不特不縣而已言縣則牲可知也司服言大荒則素服玉藻言年不順成君衣布則君不特不祭肺而已言膳則衣可知也大夫以梁爲加食君膳不祭肺故大夫不敢食梁士無故不去琴瑟君弛縣故士不敢飲酒以樂凡此皆去備也先王之于凶荒也有珍圭以恤之有委積以待之于關市則無征于刑貶則有慮大至于移民通財糾守小至於舍禁多昏殺禮猶以爲未也故膳不祭肺不食梁不樂而損於自養馬不食穀馳道不除而損於自奉凡欲與民同患而已司徒荒政索鬼神大祝天裁彌祀社稷禱祠祭法寧樂祭水旱詩之雲漢靡神不舉則歲凶莫不祭也司巫大旱則舞雩女巫大哉歌哭而請則祭莫有樂也然祭則有禱而無祀樂則有歌舞而無縣有禱而無祀郊特性所謂年不順成八蜡不通穀梁所謂禱而不祀是也有歌舞而無縣曲禮所謂祭事不縣大司樂所謂凡國之大憂令弛縣是也樂者所以薦鬼神也凶年君膳不祭肺可也祭事不縣以虧祭可乎蓋樂

所以薦鬼神亦所以崇己之德也凶年不祭失德之效也苟失其德安取于樂乎記曰五穀時熟然後實之以樂 長樂陳氏曰君子以得爲在人以失爲在己故吉事則推先于神凶事則責先於身方其爲宮室則先宗廟後宮室爲器則先祭器後燕器推先於神也歲凶則先膳不祭肺而後祭事不縣責先於身也大蜡之禮年之順成而通則曰報神而不可以爲人功年不順成而不通則曰謹民財而不以爲神羞亦此意也 盱江李氏曰掌客凡禮賓客國新殺禮凶荒殺禮札喪殺禮禍荒殺禮在野在外殺禮由是觀之非直以歲之凶則殺邦用若新建國及札喪禍荒在外在野皆殺禮也禮許儉不許無安得重困於無聊之民求備乎簋豆之事也人主所宜動心矣膳夫大荒則不舉大札則不舉天地有裁則不舉邦有大故則不舉由是觀之非直於外事殺禮若王膳亦爲之貶也譬如父母其子之不哺而日飢膏粱可哉人主所宜動心矣如此經所云皆自貶損憂民之道也如之感人心爲之悅用度不足海內不安未之前聞也

月令

仲春行冬令麥乃不熟
孟夏行秋令五穀不滋行冬令秀草不實
仲夏行冬令則雹凍傷穀行春令則五穀晚熟其國乃饑
春主生夏行春令則生之日長生之日長故熟之時晚

季夏行春令則穀實鮮落行秋令禾稼不熟
孟秋行春令五穀無實
仲冬行秋令瓜瓠不成

瓜瓠不成西之氣乘之也子宿值虛危虛危內有瓜瓠

郊特牲

八蜡以記四方四方年不順成八蜡不通以謹民財也順成之方其蜡乃通以移民也既蜡而收民息已故既蜡君子不與功

四方方有祭也其方數不熟則不通于蜡使民謹於用財也移之言羨也詩頌豐年曰爲酒爲醴烝畀祖妣以洽百禮此其羨之與 四方之內年數不得和順成熟則當方八蜡之神不得與諸方通祭所以然者欲使不熟之方萬民謹慎財物也有順成之方其蜡之八神乃與諸方通祭以蜡祭豐饒皆醉飽酒食使民欲羨也 說集 長樂劉氏曰九州之諸侯保育其民者也各視其年之豐凶則蜡之祭有行與不行焉所以謹民財不以祭祀傷其衣食也易之損曰曷之用二簋可用享言凶年而約其禮也順謂五氣時若成謂九穀皆登順成之方其蜡乃通者以答百神所以致豐饒之勞也以移民也者民底厥勤以至京坻之積必因祭報以燕勞之所以勤而移之也易其不動以爲勤移其心也易其不足以就有餘移其身也大司徒之職曰大荒大札則令邦國移民通財舍禁弛力薄征緩刑然則蜡之通不通皆聽命於司徒矣 沙隨程氏曰聖人治神人之道以爲苟曠其職如神者

亦不敢不致罰也然則四方年不順成之所八蜡不通者亦變置社稷之意非區區爲民財不足而謹之也唐禮蜡祭年不順成則緇其方守之神也此古禮之存者猶可考也

樂記

天地之道風雨不節則饑

雜記

孔子曰凶年則乘騶馬祀以下牲

注自貶損亦取易供也騶馬六種最下者下牲少牢若特豕特豚也此一節明凶荒君自貶損也校人馬有六種種馬戎馬齊馬道馬田馬此五路所乘騶馬負重載遠所乘凶年人君自貶乘騶馬也天子諸侯常祭太牢凶荒則用少牢諸侯之卿大夫常祭用少牢降用特豕士常祭用特豕降用特豚如此之屬皆爲下牲

周禮

地官

均人凡均力政以歲上下豐年則公旬用三日焉中

年則公旬用二日焉無年則公旬用一日焉

注豐年人食四鬴之歲也人食三鬴爲中歲人食二鬴爲無歲公事也旬均也

凶札則無力政無財賦不收地守地職不均地政三年大比則大均

注無力政恤其勞也無財賦恤其乏困也不收山澤及地稅亦不平計地稅也鄭鑄曰凶札不均特權時之變耳久而不修則法浸以壞三年大比時則大均不以一時之變廢萬世之常也

司關國凶札則無關門之征猶錢
注凶謂凶年饑荒無關市之征者出入無租稅廩人以歲之上下數邦用以知足否以詒國用以治年之凶豐凡萬民之食食者人四鬴上也人三鬴中也人二鬴下也

注皆謂一月食米也上謂大豐年中謂中豐年下謂少儉年

春官

大宗伯以荒禮哀凶札

肆師之職國有大故則令國人祭

注大故謂水旱凶荒所令祭者社及禘醴

天府季冬陳玉以貞來歲之歲惡

注問事之正曰貞鄭鑄曰先王防患遠憂民深故每長慮却顧以爲災害之防嘗之日上艾彌之

日卜戒社之日上祿猶以爲未足以知來歲之休咎又於季冬之月歲且更始之時而預卜之方其

問龜則天府之官陳玉以禮神玉之爲物陽精之純將以交三靈而通之故必用玉也問龜者太卜

之職天府掌出玉而陳之

司服掌王之服大荒素服

注大荒饑饉

大司樂凡大凶令弛縣

注凶凶年也

籥章凡國祈年於田祖畝幽雅擊土鼓以樂田畯

注祈年祈豐年也王昭禹曰豐年雖本於天時順而祈之亦成乎人事爾

大祝掌六祝之辭一曰順祝二曰年祝

注順豐年也鄭鑄曰祈豐年也順成之方蜡祭乃通年無必豐之理祝其順成載芟之詩之類劉執中曰二日年祝謂所祈五氣時若常大有年保章氏以五雲之物辨吉凶水旱降豐荒之祲象

秋官

士師若邦凶荒則以荒辯之法治之

注劉迎曰荒辯之法所以別其荒歲之輕重而知其中年凶年無年欲爲移民通財紓守緩刑之備使凶札而無辨安知食二鬴與不能食二鬴者哉爾雅

釋天

穀不熟爲饑蔬不熟爲饉果不熟爲荒仍饑爲薦

注此釋歲凶災荒之名也穀梁傳曰一穀不升謂之歉二穀不升謂之饑三穀不升謂之饉四穀不升謂之荒五穀不升謂之大饑又謂之大祲彼以

五穀熟之多少立差等之名其實五者皆是饑也禮緯

稽命徵

天子祭天地宗廟六宗五岳得其宜則五穀豐雷雨

時至

斗威儀

臣專政私其君位則草木不生禾穀不實

山海經

西山經

泰器之山觀水出焉西流注于流沙是多文鰐魚狀

如鯉魚魚身而鳥翼蒼文而白首赤喙常行西海遊于東海以夜飛其音如鸛雞其味酸甘食之已狂見則天下大穰

玉山有獸焉其狀如犬而豹文其角如牛其名曰狻其音如吠犬見則其國大穰

東山經

欽山有獸焉其狀如豚而有牙其名曰當康其鳴自叫見則天下大穰

史記

天官書

杓四星在危南

注正義曰杓曰三星在丈人星旁主軍糧占正下

直曰吉與曰不相當軍糧絕也曰星在南主春其占覆則歲大饑仰則大熟也

匏瓜有青黑星守之魚鹽貴

索隱曰荊州占云匏瓜一名天雞在河鼓東匏瓜

明則歲大熟也正義曰匏音白包反匏瓜五星在離珠比天子果園占明大光潤歲熟不則包果之

實不登客守魚鹽貴也

凡候歲美惡謹候歲始歲始或冬至日產氣始萌臘明日人衆卒歲一會飲食發陽氣故曰初歲正月旦

王者歲首立春日四時之卒始也

索隱曰謂立春日是去年四時之終卒今年之始也

四始者候之日

正義曰謂正月旦歲之始時之始日之始月之始故云四始言以四時之日候歲吉凶也

而漢魏鮮

孟康曰人姓名作占候者

集臘明正月旦決八風風從南方來大旱西南小旱西方有兵西北戎菽焉

孟康曰戎菽胡豆也爲成也索隱曰韋昭云戎菽大豆也又郭璞註爾雅亦云胡豆與孟康同

小雨

徐廣曰一無此上兩字

趣兵

索隱曰趣音促謂風從西北來則戎菽成而又有小雨則其國趣兵起也

北方爲中歲東北爲上歲

韋昭曰歲大穰

東方大水東南民有疾疫歲惡故八風各與其衝對課多者爲勝多勝少入勝亟疾勝徐且至食爲麥食至日秩爲稷秩至舖爲黍舖至下舖爲菽下舖至日入爲麻欲終日有雨有雲有風有日

正義曰正月旦欲其終一日有風有日則一歲之中無災害也

日當其時者深而多實無雲有風日當其時淺而多實有雲風無日當其時深而少實有日無雲不風當其時者稼有敗如食項小敗熟五斗米項大敗則風復起有雲其稼復起各以其時用雲色占種其所宜其雨雪若寒歲惡是日光明聽都邑人民之聲聲宮則歲善吉商則有兵徵旱羽水角歲惡或從正月旦比數雨

索隱曰比音鼻律反數音疎舉反謂以比數日以

候一歲之雨以知豐穰也

率日食一升至七升而極

孟康曰月一日雨民有一升之食二日雨民有二升之食如此至七日

過之不占數至十二日直其月占水旱孟康曰月一日雨正月水

爲其環城千里內占則其爲天下候竟正月

孟康曰月三十日周天歷二十八宿然後可占天下正義曰按月列宿日風雲有變占其國并太歲所在則知其歲豐稔水旱饑饉也

月所離列宿

索隱曰韋昭云離歷也

日風雲占其國然必察太歲所在在金穰水毀木饑火旱此其大經也正月上甲風從東方宜蠶風從西方若日黃雲惡冬至短極縣土炭

孟康曰先冬至三日縣土炭於衡兩端輕重適均冬至日陽氣至則炭重夏至日陰氣至則土重晉灼曰蔡邕律曆記候鍾律權土炭冬至陽氣應黃鍾通土炭輕而衡仰夏至陰氣應蕤賓通土炭重而衡低進退先後五日之中

炭動鹿解角蘭根出泉水躍略以知日至要決暑景歲星所在五穀逢昌其對爲衝歲乃有殃

正義曰言暑景歲星行不失次則無災異五穀逢其昌盛若梓景歲星行而失舍有所衝則歲乃有殃禍災變也

淮南子

天文訓

歲星之所居五穀豐昌十二歲而一康
庚子干戊子五穀有殃

戊子干庚子歲或存或亡

攝提格之歲歲早水晚早稻疾蠶不登菽麥昌民食
四升

單閼之歲歲和稻菽麥蠶昌民食五升

執徐之歲歲早早晚水小饑蠶閉麥熟民食三升

大荒落之歲歲蠶小登麥昌菽疾民食二升

敦牂之歲歲大早蠶登稻菽麥昌禾不為民食二升

協洽之歲歲登稻昌菽麥不為民食三升

涒灘之歲歲和小雨行蠶登菽麥昌民食三升

作鄂之歲歲不登菽麥不為禾蠶民食五升

掩茂之歲歲小饑蠶不登麥不為菽昌民食七升

大淵獻之歲歲大饑蠶開菽麥不為禾蠶民食三升

困敦之歲歲大霧起大水出蠶稻菽麥昌民食三升

赤奮若之歲歲早水蠶不出稻疾菽不為麥昌民食
一升

漢書

天文志

太白在南歲在北名曰牝牡年穀大熟太白在北歲
在南年或有或亡

五行志

傳曰治宮室飾臺榭內淫亂犯親戚侮父兄則稼穡
不成說曰土中央生萬物者也其于王者為內事宮
室夫婦親屬亦相生者也古者天子諸侯宮廟大小
高卑有制后夫人媵妾多少進退有度九族親疎長
幼有序孔子曰禮與其奢也寧儉故禹卑宮室文王

刑于寡妻此聖人之所以昭教化也如此則土得其
性矣若乃奢淫驕慢則土失其性有水旱之災而草
木百穀不熟是為稼穡不成
京房易飛候

青雲占

視四方常有青雲主豐

玉曆通政經

占歲

冬至之日見雲送迎從下鄉來歲美無雲送迎德薄
歲惡

齊民要術

雜說

師曠占五穀貴賤法常以十月朔日占春羅貴賤風
從東來春賤逆此者貴以四月朔占秋羅風從南來
西來者秋貴逆此者貴以正月朔占夏羅風從南
來東來者皆賤逆此者貴

師曠占五穀曰正月甲戌日大風東來折樹者穀熟
甲寅日大風西北來者貴庚寅日風從西來者皆貴

二月甲戌日風從南來者稻熟乙卯日不雨晴明稻
上場不熟四月四日雨稻熟日月珥天下喜十五日

十六日雨晚稻善日月蝕

師曠占五穀早晚曰粟米常以九月為本若貴賤不
時以最賤之月為本粟以秋得本貴在來夏以冬得
本貴在來秋此收穀遠近之期也早晚以其時差之
粟米春夏貴去年秋冬什七到夏復貴秋冬什九者
是陽道之極也急糶之勿留留則大賤也

物理論曰正月望夜占陰陽陽長即早陰長即水立

表以測其長短審其水旱表長二尺月影長二尺以
上大旱二尺五寸至三尺小旱三尺五寸至四尺
適高下皆熱四尺五寸至五尺小水五尺五寸至六
尺大水月影所極則正面也立表中正乃得其定又
曰正月朔旦四面有黃氣其歲大豐此黃帝用事土
氣黃均四方並熟有青氣雜黃有螟蟲赤氣大旱黑
氣大水正朔占歲星上有青氣宜桑赤氣宜豆黃氣
宜稻

師曠占曰黃帝問曰吾欲占藥善一心可知不對曰
歲欲甘甘草先生薺歲欲苦苦草先生薺歲欲雨
雨草先生薺歲欲旱旱草先生薺歲欲荒荒草先
生薺歲欲病病草先生薺

宋史

天文志

八穀八星在華蓋西五車北一曰在諸王西武密曰
主候歲豐儉一稻二黍三大麥四小麥五大豆六小
豆七粟八麻廿氏曰八穀在宮北門之右司親耕司
候歲司尚食星明吉一星亡一穀不登八星不見大
饑客星入穀貴彗星入為水黑雲氣犯之八穀不收
天廚六星在扶筐北一曰在東北維外主盛饌今光
祿廚也星亡則饑不見為凶客星流星犯之亦為饑
糠一星在箕舌前杓西北明則豐熟暗則民饑流亡
杓三星在箕南主給庖春動則人失釜飢饉則豐穰
則大饑亡則歲荒移徙則人失業災惑守民流客星
犯守歲饑彗字犯天下有急兵

農丈人一星在南斗西南老農主稼穡者又主先農
農正官星明歲豐暗則民失業移徙歲饑客星彗星

守之民失耕歲荒

天爵三星在五諸侯南一曰在東井北爵器也主盛饒粥以給貧餒明為豐暗則歲惡

五色線

歲星占

歲守心則年豐歲為重華故主豐年

婁元禮田家五行

論草

五穀草占稻色草有五穗近本草為早色腰末為晚禾隨其穗之美惡以斷豐歉未必極驗但其草每年根根相似

論花

草花雜占云薺菜先生歲欲甘葶藶先生歲欲苦薺先生歲欲雨薺藜先生歲欲旱蓬先生歲欲荒水薺先生歲欲惡艾先生歲欲病皆以孟春占之係江南農事云

論走獸

鼠咬麥苗主不見收咬稻苗亦然

論祥瑞

兩岐麥謂一稂而秀兩穗也主時年祥瑞又主其田秋必倍收

珍珠船

杏花占

師曠占術杏花多者不蟲者來年秋禾善

豐歉部彙考二

周

桓王三年京師饑

按左傳魯隱公六年冬京師來告饑公為之請糴於宋衛齊鄭禮也

惠王十一年魯大無麥禾

按春秋魯莊公二十八年大無麥禾

按公羊傳冬既見無麥禾矣曷為先言築鄆而後言無麥禾諱以凶年造邑也

按穀梁傳大者有顧之辭也于無禾及無麥也

按漢書五行志嚴公二十八年冬大水亡麥禾董仲舒謂夫人哀姜淫亂逆陰氣故大水也劉向謂水旱當書不書水旱而曰大亡麥禾者土氣不養稼穡不成者也是時夫人淫於二叔內外亡別又因凶饑一年而三築臺故應是而稼穡不成飾臺榭內淫亂之罰云遂不改寤四年而死甌流二世奢淫之患也

襄王五年晉饑

按左傳魯僖公十三年冬晉薦饑使乞糴于秦

六年秦饑

按左傳魯僖公十四年冬秦饑使乞糴于晉

七年晉饑

按左傳魯僖公十五年晉饑秦輸之粟

十二年魯饑

按左傳魯僖公二十一年夏大旱是歲也饑而不害

匡王二年宋饑

按左傳魯文公十六年秋八月宋公子鮑禮于國人

宋饑竭其粟而貸之

定王十四年冬魯大有年

按春秋魯宣公十有六年冬大有年

按穀梁傳五穀大熟為大有年

程氏曰大有年記異也旱乾水溢饑饉為臻者災也山崩地震彗孛飛流者異也景星甘露醴泉芝草百穀順成者祥也大有年上瑞矣何以為記

異乎凡災異慶祥皆人為所感而天以其類應之者也人事順于下則天氣和于上宣公弑立逆理

亂倫水旱螽蟥饑饉之變相繼而作史不絕書宜也獨于是冬乃大有年所以為異乎夫有年大有年一耳古史書之則為祥仲尼筆之則為異此言

外微旨非聖人莫能脩之者也

景王元年鄭宋饑

按左傳魯襄公二十九年鄭饑而未及麥民病于皮餓國人粟尸一鍾子罕聞之曰鄰于善民之望也宋亦饑請于平公出公粟以貸

靈王十三年冬魯大饑

按春秋魯襄公二十四年冬大饑

按穀梁傳五穀不升為大饑一穀不升謂之歉二穀不升謂之饑三

穀不升謂之饑四穀不升謂之康五穀不升謂之大

被大被之禮君食不兼味臺榭不塗弛侯廷道不除

百官布而不制鬼神禱而不祀此大被之禮也

大何氏曰有死傷曰大饑無死傷曰饑

敬王十五年蔡饑

按左傳魯定公五年夏歸粟於蔡以周亟於無資

秦

始皇三年歲大饑

按史記秦始皇本紀云云

十九年上谷大饑

按史記秦始皇本紀云云

漢

高祖二年關中大饑

按漢書高祖本紀二年六月關中大饑米斛萬錢人相食令民就食蜀漢 按食貨志漢興接秦之敝諸侯並起民失作業而大饑僅凡米石五千人相食死者過半

景帝元年詔以比歲不登聽民徙寬大地

按漢書景帝本紀元年春正月詔曰聞者歲比不登民多乏食天絕年朕甚痛之郡國或饒陋無所農桑穀畜或地饒廣薦草莽水泉利而不得徙其議民欲徙寬大地者聽之

後二年饑

按漢書景帝本紀後二年春以歲不登禁內郡食馬粟沒入之

後三年歲比不登

按漢書景帝本紀三年春正月詔曰聞歲或不登意為未者衆農民寡也其令郡國務勸農桑益種樹可得衣食物

武帝建元三年春大饑

按漢書武帝本紀建元三年春大饑人相食

元符二年山東饑

按漢書武帝本紀元符三年秋遣謁者勸有水災郡種宿麥舉吏民能假貸貧民者以名聞 按食貨志山東被水災民多饑乏

元鼎二年饑

按漢書武帝本紀元鼎二年夏大水關東饑死者以千數

昭帝始元四年歲比不登

按漢書昭帝本紀四年秋七月詔曰比歲不登民匱於食流庸未盡還往時令民共出馬其止勿出 元鳳三年饑

按漢書昭帝本紀元鳳三年春正月詔曰遭者民被水災頗匱於食朕虛倉廩使使者振困乏

宣帝本始四年歲不登

按漢書宣帝本紀本始四年春詔令歲不登遣使者賑貸困乏 按食貨志宣帝即位用更多選賢良百姓安土歲數豐穰穀至石五錢

元帝初元元年歲不登

按漢書元帝本紀初元元年夏四月詔關東今年穀不登民多困乏其令郡國被災害甚者毋出租賦九月關東郡國十一饑或人相食 按貢禹傳元帝初即位徵禹為諫議大夫數虛已問以政事是時年歲不登郡國多困禹奏言古者宮室有制宮女不過九人秣馬不過八匹牆塗而不凋木摩而不刻車輿器物不文畫苑園不過數十里與民共之任賢使能什一而稅亡它賦斂繇戍之役使民歲不過三日千里之內自給千里之外各置貢職而已故天下家給人足頌聲並作至高祖孝文孝景皇帝循古節儉宮女不過十餘廐馬百餘匹孝文皇帝衣綈履革器亡珎文金銀之飾後世爭為奢侈轉轉益甚臣下亦相放效衣服履絳刀劍亂於王上王上時臨朝入廟衆人

不能別異甚非其宜然非自知奢僭也猶魯昭公曰吾何僭矣今大夫僭諸侯諸侯僭天子天子過天道其日久矣承衰救亂矯復古人在於陛下臣愚以為盡如太古難宜少放古以自節焉論語曰君子樂節禮樂方今宮室已定亡可奈何矣其餘盡可減損故時齊三服官輸物不過十箇方今齊三服官作工各數千人一歲費數鉅萬蜀廣漢主金銀器歲各用五百萬三工官官費五千萬東西織室亦然廐馬食粟將萬匹臣禹嘗從之東宮官賜杯案盡文畫金銀飾非當所以賜食臣下也東宮之費亦不可勝計天下之民所為饑餓死者是也今民大饑而死死又不葬犬豬所食人至相食而廐馬食粟苦其大肥氣盛怒至乃日步作之王者受命於天為民父母固當若此乎天不見邪武帝時又多取好女至數千人以填後宮及棄天下昭帝幼弱霍光專事不知禮正妄多滅金銀財物鳥獸魚鼈牛馬虎豹生禽凡百九十物盡瘞滅之又皆以後宮女置於園陵大失禮遵天心又未必稱武帝意也昭帝晏駕光復行之至孝宣皇帝時陛下惡有所言羣臣亦隨故事甚可痛也故使天下承化取女皆大過度諸侯妻妾或至數百人豪富吏民畜歌者至數十人是以內多怨女外多曠夫及衆庶葬埋皆虛地上以實地下其過自上生皆在大臣循故事之舉也唯陛下深察古道從其儉者大減損乘輿服御器物三分去二子產多少有命審察後宮擇其賢者留二十人餘悉歸之及諸陵園女亡子者宜悉遣獨杜陵宮人數百誠可哀憐也廐馬可亡過數十匹獨舍長安城南苑地以為田獵之圃自城

西南至山西至鄆皆復其田以與貧民方今天下饑饉可亡大自減損以救之稱天意乎天生聖人蓋為萬民非獨使自娛樂而已也故詩曰天難諶斯不易

惟王上帝臨女母貳爾心當仁不讓獨可以聖心參諸天地揆之往古不可與臣下議也若其阿意順指隨君上下臣禹不勝拳拳不敢不盡愚心天子納善其忠乃下詔令大僕減食穀馬水衡減食肉獸省宜春下苑以與貧民又罷角抵諸戲及齊三服官遷禹為光祿大夫

初元二年饑按漢書元帝本紀二年三月詔曰間者歲數不登元元困乏不勝饑寒以陷刑辟朕甚憫之六月關東饑齊地人相食秋七月詔曰歲比災害民有菜色慘怛于心已詔吏虛倉廩開府庫賑救今秋禾麥頗傷其咎安在公卿其悉陳朕過靡有所諱按食貨志元帝即位天下大水關東郡十一尤甚二年齊地饑穀石三百餘民多餓死琅邪郡人相食

初元五年關東饑按漢書元帝本紀五年夏四月詔曰迺者關東連遭災害饑寒疾疫天不終命

末光元年大饑按漢書元帝本紀末光元年三月隕霜傷麥稼秋罷

晉灼曰五行志末光元年三月隕霜殺桑九月二日隕霜殺棘天下大饑師古曰秋罷者言秋時無所收也

末光二年饑按漢書元帝本紀二年夏六月詔曰間者連年不收

四方咸困元元之民勞於耕耘又亡成功困于饑饉亡以相救朕為民父母德不能覆而有其刑其自傷焉其救天下

建昭四年饑按漢書元帝本紀建昭四年夏四月詔曰間者陰陽不調五行失序百姓饑饉悉庶失業

成帝末始二年饑按漢書成帝本紀末始二年二月乙酉詔曰關東比歲不登吏民以義收食貧民入穀物助縣官賑贍按食貨志末始二年梁國平原郡比歲傷水災人相食刺史守相坐免

後漢光武帝建武二年關中饑民食野穀按後漢書光武帝本紀建武二年九月關中饑人相食初王莽末天下旱蝗黃金一斤易粟一斛至是野穀旅生麻末九盛野蠶成繭被於山阜人收其利焉

明帝永平五年歲稔按後漢書明帝本紀不載按食貨志顯宗即位天下安寧民無橫徭歲比登稔永平五年作常滿倉立粟市於城東粟斛直錢二十草樹殷阜牛羊彌望作貢九輕府廩還積姦回不用禮義專行於時傳曰三統之元有陰陽之九焉蓋天地之恆數也

永平九年大有年按後漢書明帝本紀云云

永平十二年歲屢豐按後漢書明帝本紀十二年歲比登稔百姓殷富粟斛三十牛羊被野

章帝建初元年饑按後漢書章帝本紀不載按東平王蒼傳建初元年蒼上便宜帝報書曰災異之隆緣政而見今改元之後年饑人流此朕之不德感應所致

建初二年饑按後漢書章帝本紀二年春三月詔曰比年陰陽不調饑饉屢臻深惟先帝憂人之本

和帝永元五年饑按後漢書和帝本紀末元五年三月遣使者分行貧民舉實流冗開倉賑廩三十餘郡按樊準傳永元之初連年水旱災異郡國多被饑困

永元六年饑按後漢書和帝本紀六年三月詔流民所過郡國皆實粟之丙寅詔以濟河之域凶饉流亡其令舉賢良方正能直言極諫之士各一人

安帝末初二年大饑按後漢書安帝本紀末初二年春正月冀河南下郡東萊河內貧民

古今注曰時州郡大饑米石二千人相食老弱相棄道路

二月乙丑遣光祿大夫樊準召倉分行冀兖二州東

貸流民秋七月戊辰詔曰昔在帝王承天理民莫不

據璇璣玉衡以齊七政朕以不德違奉大業而陰陽

差越變異互見萬民饑流羌貊叛戾風宿克己憂心

京京問令公卿郡國舉賢良方正遠求博選開不諱

之路冀得至謀以鑒不逮而所對皆循尚浮言無卓

爾異聞其百僚及郡國吏人有道術明習災異陰陽

之度璇璣之數者各使指變以開二千石長吏明以詔書博衍幽隱朕將親覽待以不次冀獲嘉謀以承天誠

末初三年大饑

按後漢書安帝本紀三年三月京師大饑民相食壬辰公卿詣闕謝詔曰朕以幼冲奉承鴻業不能宣流風化而感逆陰陽至今百姓饑荒更相啖食永懷悼歎若墜淵水咎在朕躬非羣司之責而過自貶引重朝廷之不德其務思變復以助不逮是歲并涼二州大饑人相食 按續漢書四年詔比年饑加有軍旅且勿設戲作樂正旦無充庭車也

永初七年南陽等郡饑

按後漢書安帝本紀七年九月調零陵桂陽丹陽豫章會稽租米賑給南陽廣陵下邳彭城山陽廬江九江饑民

順帝陽嘉二年吳郡饑

按後漢書順帝本紀陽嘉二年春二月詔以吳郡會稽饑荒貸人種糧

桓帝建和元年饑

按後漢書桓帝本紀建和元年二月荆揚二州人多餓死

末興元年饑

按後漢書桓帝本紀末興元年秋七月百姓饑窮流冗道路至有數十萬戶冀州九甚

末興二年饑

按後漢書桓帝本紀二年九月詔饑饉薦臻其不被害郡縣當爲饑餒者儲

永壽元年冀州饑

按後漢書桓帝本紀末壽元年二月司隸冀州饑人相食敕州郡賑給貧弱

延熹九年豫州饑

按後漢書桓帝本紀延熹九年三月司隸豫州饑死者什四五至有滅戶者遣三府掾賑廩之

獻帝興平元年饑

按後漢書獻帝紀興平元年穀一斛五十萬豆麥一斛二十萬人相食啖白骨委積帝使侍御史侯汶出太倉米豆爲饑人作糜粥經日而死者無數

建安二年江淮饑

按後漢書獻帝本紀建安二年歲饑江淮間民相食

魏

文帝黃初三年饑

按魏志文帝本紀黃初三年秋七月冀州民饑黃初五年冀州饑

按魏志文帝本紀五年十一月庚寅以冀州饑遣使者開倉廩賑之

明帝青龍三年關東饑

按魏志明帝本紀不載 按晉書宣帝本紀青龍三年關東饑

齊王芳嘉平四年關中饑

按魏志三少帝本紀不載 按晉書食貨志云云

吳

大帝嘉禾三年歲不登

按吳志孫權傳嘉禾三年春正月詔曰兵久不輟民困於役歲或不登其寬諸逋勿復督課

赤烏三年冬十一月民饑

按吳志孫權傳云云

烏程侯

年稼穡不成饑

按晉書五行志吳孫皓時常歲無水旱苗稼豐美而實不成百姓以饑閭境皆然連歲不已吳人以爲傷露非也按劉向春秋說曰水旱當書不書水旱而曰大無麥禾者土氣不養稼穡不成此其義也皓初遷都武昌尋還建業父起新館綴飾珠玉壯麗過甚破壞諸宮增廣苑囿犯暑妨農官私疲怠月令季夏不可以興土功皓皆冒之此脩宮室飾臺榭之罰也

晉

武帝泰始七年雍涼秦饑

按晉書武帝本紀泰始七年五月雍涼秦三州饑赦其境內殊死以下

咸寧五年饑

按晉書武帝本紀咸寧五年二月乙亥以百姓饑饉減御膳之半

太康六年屢年不登

按晉書武帝本紀太康六年春正月庚申朔以比歲不登免租貸宿負

惠帝元康四年饑

按晉書惠帝本紀元康四年秋八月大饑

元康六年饑

按晉書惠帝本紀六年關中饑

元康七年饑

按晉書惠帝本紀七年秋七月關中饑米斛萬錢元康八年春雍州饑秋有年

按晉書惠帝本紀八年春正月詔發倉廩賑雍州饑人秋九月雍州有年

愍帝建興四年饑

按晉書愍帝本紀建興四年冬十月京師饑甚米斗

金二兩人相食死者大半

元帝太興元年江東饑

按晉書元帝本紀太興元年十二月江東三郡饑遣使賑給之

太興二年三吳饑

按晉書元帝本紀二年五月吳郡大饑是歲三吳大饑

明帝太寧元年饑

按晉書明帝本紀太寧元年冬十一月以軍國饑乏調刺史以下米各有差

成帝咸和四年饑

按晉書成帝本紀咸和四年春正月城中大饑米斗萬錢

咸和五年大饑

按晉書成帝本紀不載 按五行志咸和五年無麥禾天下大饑

咸康元年揚州諸郡饑

按晉書成帝本紀咸康元年二月揚州諸郡饑遣使賑給

孝武帝太元六年大饑

按晉書孝武帝本紀太元六年秋七月甲午交州平大饑 按五行志六年無麥禾天下大饑

安帝隆安五年饑

按晉書安帝本紀隆安五年是歲饑元興元年無麥禾天下大饑 按晉書安帝本紀不載 按五行志云云

不登百姓饑寒不能自存者甚衆其出布帛倉穀以振貧窮 按食貨志二年不熟京畿之內路有行饑帝以饑將遷都於鄴用博士崔浩計乃止 泰常八年饑

按北史魏太宗本紀泰常八年歲饑詔所在開倉振給 世祖神鼎四年饑

按北史魏太武帝本紀神鼎四年二月定州人饑詔開倉以振之 太平眞君元年饑

按魏書世祖本紀太平眞君元年州鎮十五民饑開倉振恤 太平眞君九年饑

按魏書世祖本紀九年二月癸卯山東民饑詔開倉振之 高宗太安三年饑

按魏書高宗本紀太安三年十有二月以州鎮五蝗民饑使使者開倉以振之 太安五年饑

按北史魏高宗本紀五年冬十二月戊申詔以六鎮雲中高平二雍秦州徧遇災旱年穀不收開倉振乏有徙流者喻還桑梓 顯祖天安元年饑

按魏書顯祖本紀天安元年州鎮十一旱民饑開倉振恤 皇興四年饑

按魏書顯祖本紀皇興四年州鎮十一民饑

高祖延興三年饑 按魏書高祖本紀延興三年相州民饑死者二千八百四十五人 延興四年饑

按北史魏高祖本紀四年州鎮十三大饑丐人田租開倉振之 太和元年饑

按魏書高祖本紀太和元年春正月己酉雲中饑開倉振恤十有二月丁未州郡八水旱蝗民饑 太和二年饑

按北史魏高祖本紀二年州鎮二十餘水旱人饑詔開倉振恤 太和三年饑

按魏書高祖本紀三年六月辛未以雍州民饑開倉振恤 太和四年饑

按北史魏高祖本紀四年郡鎮十八水旱人饑詔開倉振恤 太和五年饑

按北史魏高祖本紀五年十二月癸巳州鎮十二饑詔開倉振恤 太和七年饑

按北史魏高祖本紀七年三月甲戌以冀定二州饑詔郡縣爲粥於路以食之六月定州上言爲粥所活九十四萬七千餘口九月冀州上言爲粥所活七十三萬一千七百餘口十一月州鎮十三饑詔開倉振恤

太和八年饑 按北史魏高祖本紀八年十二月州鎮十五水旱人饑詔使者開倉振恤 太和九年饑

按北史魏高祖本紀九年八月庚申詔曰數州災水饑僅存孫民有賣鬻男女者天譴在予一人百姓橫罹艱毒今自太和六年已來買定冀幽相四州饑人良口者盡還所親雖聘爲妻妾遇之非理情不樂者亦離之是歲京師及州鎮十三水旱傷稼 太和十年饑

按魏書高祖本紀十年十有二月乙酉詔以汝南潁川大饑丐民田租開倉振恤 太和十一年饑

按魏書高祖本紀十有一年二月甲子詔以肆州之鴈門及代郡民饑開倉振恤六月辛巳秦州民饑開倉振恤秋七月己丑詔曰今年穀不登聽民出關就食遣使者造籍分遣去留所在開倉振恤是歲大饑詔所在開倉振恤 按韓麒麟傳麒麟除冠軍將軍齊州刺史太和十一年京都大饑麒麟表陳時務曰

古先哲王經國立治積儲九稔謂之太平故躬籍千畝以勵百姓用能衣食滋茂禮教興行逮於中代亦崇斯業入粟者與斬敵同爵力田者與孝悌均賞實百王之常軌爲治之所先今京師民庶不出者多遊食之口三分居二蓋一夫不耕或受其饑况於今者動以萬計故頃年山東遭水而民有餓終今秋京都遇旱穀價踴貴實由農人不勸素無儲積故也伏惟陛下天縱欽明道高三五味且憂勤思恤民敝雖帝

虞一日萬幾周文昇不暇食蔑以爲喻上垂覆載之澤下有凍餒之人皆由有司不爲明制長吏不恤其本自承平日久豐穰積年競相矜夸遂成侈俗車服第宅奢僭無限喪葬婚娶爲費實多貴富之家童妾衫服工商之族玉食錦衣農夫傭糶蠶婦之短褐故令耕者日少田有荒蕪穀帛罄于府庫寶貨盈于市里衣食匱于室麗服溢于路饑寒之本實在于斯愚謂凡珍玩之物皆宜禁斷吉凶之禮備爲格式令貴賤有別民歸朴素制天下男女計口受田宰司四時巡行臺使歲一按檢勸相勸課嚴加賞罰數年之中必有盈贍雖遇災凶免于流亡矣往年校比戶賈租賦輕少臣所統齊州租粟纔可給俸略無入倉雖於民爲利而不可長久脫有戎役或遭天災恐供給之方無所取濟可減絹布增益穀租年豐多積歲檢出賑所謂私民之穀寄積於官官有宿積則民無荒年矣

太和十二年饑

按北史魏高祖本紀十二年十一月雍豫二州人饑詔開倉振恤

太和十三年饑

按魏書高祖本紀十有三年夏四月己丑州鎮十五大饑詔所在開倉振恤按高閭傳太和十四年秋閭上表曰奉詔以春夏少雨憂饑饉之方臻懸黎元之傷瘁同禹湯罪己之誠齊堯舜引咎之德虞災致懼詢及卿士令各上書極陳損益臣聞皇天無私降鑒在下休咎之徵咸由人召故帝道昌則九疇叙君德衰而算倫數休瑞並應享以五福則康于其邦谷

徵屢臻罰以六極則害于其國斯乃洪範之實徵神祇之明驗及其厄運所纏世鍾陽九數垂于天理事違于人謀時則有之矣故堯湯逢歷年之災周漢遭水旱之患然立功修行終能弭息

太和二十年歲餘

按北史魏高祖本紀二十年十二月甲子以西北州郡早儉遣侍臣巡察開倉振恤

太和二十三年世宗即位饑

按北史魏世宗本紀二十三年四月卽皇帝位是歲州鎮十八水饑分遣使者開倉振恤

世宗景明元年饑

按魏書世宗本紀景明元年五月甲寅以北鎮大饑遣兼侍中楊播巡撫賑恤是歲十七州大饑分遣使者開倉賑恤按薛安都傳安都從祖弟眞度爲豫州刺史景明初豫州大饑眞度表曰去歲不收饑饉十五今又災雪三尺民人萎餓

景明二年饑

按魏書世宗本紀二年三月青齊徐兗四州大饑民死者萬餘口

景明三年饑

按魏書世宗本紀三年河州大饑死者二千餘口

正始四年饑

按北史魏世宗本紀正始四年秋八月辛丑敦煌人饑詔開倉賑恤九月景戌司州人饑詔開倉賑恤未

平元年春三月景午以去年早儉遣使者所在賑恤

永平二年饑

按魏書世宗本紀永平二年夏四月己酉詔以武川

鎮饑開倉賑恤

永平三年歲餘

按北史魏世宗本紀三年五月丁亥冀定二州旱儉詔開倉賑恤

永平四年饑

按魏書世宗本紀四年二月壬午青齊徐兗四州民饑甚遣使賑恤

延昌元年饑

按魏書世宗本紀延昌元年夏四月戊辰詔河北民就穀燕恆二州辛未詔饑民就穀六鎮五月丙午詔天下有粟之家供年之外悉貸饑民六月庚辰詔出太倉粟五十萬石以賑京師及州郡饑民

延昌二年饑

按魏書世宗本紀二年二月丙辰朔賑恤京師貧民甲戌以六鎮大饑開倉賑恤是春民饑餓死者數萬

口夏四月庚子以絹十五萬匹賑恤河南郡饑民六月乙酉青州民饑詔使者開倉賑恤

延昌三年饑

按魏書世宗本紀三年夏四月青州民饑辛巳開倉賑恤

肅宗熙平元年饑

按魏書肅宗本紀熙平元年夏四月戊戌以瀛州民饑開倉賑恤五月丁卯朔詔曰炎旱積辰苗稼萎悴

比雖微澍猶未霑洽晚種不納企望憂勞在予之責

思自兢厲尚書可釐恤獄狎察其淹枉簡諒輕重隨事以聞無使一人怨嗟增傷和氣土木作役權皆休

罷勸農省務肆力田疇庶嘉澤近降豐年可必

熙平二年饑

按魏書肅宗本紀二年冬十月幽冀滄瀛四州大饑光州饑歉

神龜元年饑

按魏書肅宗本紀神龜元年春正月乙酉幽州大饑民死者三千七百九十九人詔刺史趙邕開倉賑恤

出帝太昌元年饑

按魏書出帝本紀太昌元年五月詔西土年饑百姓流徙其有露屍令所在埋覆

孝靜帝天平三年饑

按魏書孝靜帝本紀天平三年冬十一月戊申詔遣使巡檢河北流移饑人

天平四年饑

按魏書孝靜帝本紀不載 按北史齊神武本紀四年二月乙酉神武以并肆汾建管東雍南汾秦陝九州霜旱人饑流散請所在開倉賑給

文帝大統二年大饑

按北史魏文帝本紀大統二年關中大饑人相食死者十七八

恭帝四年浙州饑

按魏書恭帝本紀不載 按周書孝閔帝本紀元年三月壬子詔曰浙州去歲不登厥民饑饉朕用愍焉

北齊

武成帝河清三年饑

按北齊書武成本紀河清三年是歲山東大水饑死者不可勝計詔發賑給事竟不行

河清四年年穀不登

按北史齊武成本紀四年二月壬申以年穀不登禁酤酒

後主武平四年山東饑

按北齊書後主本紀不載 按隋書五行志齊後主武平四年山東饑是時大興土木之功於仙都苑又起宮於邯鄲窮侈極麗役宮侍御千餘人皆寶衣玉食逆中氣之咎也

武平六年饑

按北齊書後主本紀七年春正月壬辰詔去秋以來水潦人饑不自立者所在付大寺及諸富戶濟其性命

北周

武帝天和六年饑

按周書武帝本紀建德元年三月詔去秋年穀不登民有散亡家空杼軸朕每旦慕已夕惕兢懷自今正調以外無妄徵發庶時俗殷阜稱朕意焉

建德三年饑

按周書武帝本紀三年春正月丙子詔以往歲年穀不登民多乏絕令公私道俗凡有積貯粟麥者皆准口聽留以外盡糶

建德四年饑

按周書武帝本紀四年岐寧二州民饑 按邵惠公顥傳顥子導導子椿建德初除岐州刺史四年關中民饑椿表陳其狀聖書勞慰

隋

文帝開皇十四年饑

按隋書文帝本紀開皇十四年八月關中大饑

煬帝大業五年大饑

按隋書煬帝本紀不載 按五行志大業五年燕代齊魯諸郡饑先是建立東都制度崇侈又宗室諸王多遠徙邊郡

唐

太宗貞觀元年饑

按唐書太宗本紀貞觀元年十月丁酉以歲饑減膳

按五行志貞觀元年關內饑

貞觀二年饑

按唐書太宗本紀二年三月己巳遣使巡關內出金寶贖饑民鬻子者還之

按舊唐書本紀二年八月河南河北大霜人饑

貞觀八年饑

按唐書太宗本紀不載 按虞世南傳貞觀八年山東及江淮大水帝憂之以問世南對曰山東淫雨江淮大水恐有冤獄枉繫帝然之於是遣使賑饑民申挺獄訟多所原赦

高宗末徽五年大稔

按唐書高宗本紀不載 按冊府元龜永徽五年大稔雜米斛至兩錢半梗米斗至十一文

顯慶元年以民饑減膳

按唐書高宗本紀不載 按冊府元龜顯慶元年二月上封人奏稱去歲粟麥不登百姓有食糟糠者帝命取所食物視之驚嘆手詔曰上封人所進食極惡情之憂灼中宵輟寐未言給足取愧良深夫國以人為本人以食為天百姓不足君孰與足朕臨御天下

於今七年每雷心庶績軫慮農畝而政道未凝仁風猶缺致令九年無備四氣有乖遂使去秋霖滯便即罄竭所以竹西郊而結念眷東作以勞懷豈下乏農夫上甘珍饈宜令所司常進之食三分減二羣臣奏言伏見手詔以近畿諸州百姓少食特為減膳去年雖不善熟未是大饑陛下憂勞情深發使賑給復為減膳在外黎庶不勝喜慶帝曰比日亦聞百姓食少不謂至是今所見者乃非人所食物朕聞天子以百姓心為心豈有見有如此一身獨供豐饌自見此食憂歎不能已也三月對兩百僚請復常膳許之

總章二年饑

按唐書高宗本紀不載 按五行志總章二年諸州四十餘饑關中尤甚

咸亨元年饑

按唐書高宗本紀咸亨元年八月庚戌以穀貴禁酒是歲大饑

咸亨三年饑

按唐書高宗本紀不載 按唐會要三年關中饑

儀鳳三年饑

按唐書高宗本紀不載 按冊府元龜三年四月以同州饑沙苑及長春宮並許百姓樵採漁獵

儀鳳四年春東都饑

按唐書高宗本紀不載 按五行志云云

調露元年秋關中饑

按唐書高宗本紀不載 按五行志云云

末隆元年饑

按唐書高宗本紀不載 按五行志末隆元年冬東

都饑

按舊唐書本紀末隆元年十一月洛州饑減價官糶以救饑人

末淳元年饑

按唐書高宗本紀末淳元年六月大蝗人相食 按五行志永淳元年關中及山南州二十六饑京師人相食

按冊府元龜末淳元年正月朔以年饑受朝賀而不設會放雍州諸府兵士於鄧綬等州就穀

弘道元年饑

按唐書高宗本紀不載 按舊唐書本紀末淳二年元弘道天后自封岱之後勸上封中岳每下詔草儀注以歲饑而止

中宗嗣聖四年饑

按唐書武后本紀不載 按五行志垂拱三年天下

饑

嗣聖五年饑

按唐書武后本紀不載 按舊唐書本紀垂拱四年

春二月山東河南甚饑乏

嗣聖十八年饑

按唐書中宗本紀不載 按五行志大足元年春河

南諸州饑

神龍二年饑

按唐書中宗本紀不載 按舊唐書本紀二年河北

水大饑

景龍元年饑

按唐書中宗本紀不載 按舊唐書本紀神龍三年

元年夏山東河北二十餘州旱饑饉疫死者數千計

景龍二年春饑

按唐書中宗本紀不載 按五行志云云

按冊府元龜二年二月以河朔諸州多饑乏命張知泰巡問賑恤

景龍三年饑

按唐書中宗本紀不載 按五行志三年三月饑 按冊府元龜三年三月制發倉廩賑饑人

睿宗先天二年饑

按唐書睿宗本紀不載 按五行志先天二年冬京師岐隴幽州饑

元宗開元二年饑

按唐書元宗本紀不載 按張廷珪傳開元初大旱關中饑詔求直言廷珪上疏曰古有多難興國殷憂啓聖蓋事危則志銳情苦則慮深故能轉禍為福也

景龍先天年間凶黨亂陛下神武汛掃氛垢日月所燭無不濡澤明明上帝宜錫介福而項陰陽愆候九穀失稔關輔尤劇臣思天意殆以陛下春秋鼎盛不崇朝有大功輕棄舜而不法思秦漢以自高故昭見咎異欲日慎一日永保天和是皇天於陛下賡願深矣陛下得不奉若休休而寅畏哉誠願約心削志考

前王之書敦素樸之道登端士放佞人屏後宮減外廐場無蹴鞠之玩野絕從禽之樂促遠境罷縣戍矜惠窮惸獨薄徭徭賦去淫巧捐珠璧不見可欲使心不亂或謂天戒不足畏而上帝愆怒風雨迷錯荒饉日甚則無以濟下矣或謂人窮不足恤而億兆攜離愁

此為試讀，需要完整PDF請訪問：www.ertongbook.com